

TESTAMENT DE L'OM SALVARECH 2023

Uf... che stuf che son – Pose tacà cosita el me descore?
È na sporta de aveliment – che se à impienì de lonc le ore.

Mostri! Stè tanto ben a Piqual – onde che ogni rumor se stusa
podè stamene là chiet – ma a fà che me desniveo da la busa?

Elo suziedù che da l'ultim an – che val la pena de faghe i fioc?
Nia! Vardevemo dintorn... – l'è quasi pì svei i Taloc.

Uf... che strac che son – ogni anada semper pedo la buta
me se indelis i sentimenti – la voia la se à fat suta.

Che peiger son drìo che devente – par de ese en lecagn dal
fastidiee a ciucià la fuoia – e sparise co na preisa de sal

Quant vane che le è le ciacole – pase su la boca de ogni cristian
ma chel che dis l'Om Salvarech – el resentè co le straze, drioman

Na outa me insustè – ciapè fuoc e me sciochetea tuta la testa
e ades co sente el calduz – son fin content de brusà a festa

Uf... che stomegà che son – la lenga l'è ani che me intorde
fae solche en cin de sbave – oramai gnanca pì no morde

Indana che continue a dive – che tanto muda solche el Governo
quasù no se sona en pifero – gnanca se lo ordena el Padre Eterno

Sponte fora da rastuogn – e stufe instes pì de calchidun
par quasi che me la gode – a catà fora le pedo del comun

Me le coise una a una col restel – e co leva el sol fae rodela
e sicome son spandaruol - ve contarè de chesta e anca de chela

Saveo onde che part la vergogna? – A Costolin, pena drìo el capitel
l'è na breiga smarza – che la sarà anca agra a cenì su el cartel

Che sie la rappresentazion del nos paeis? – somea fat a posta
“La Val a pindolon – no i è boni de tirase su de na costa!”

E pena su soura a le Valine – no l'era el luoc de le Donaze?
Elo che no le fà pì tema – parché i imbuga la Cocolusa de squaze

Che sonde che siè – no savarè che le porcarie le va in Ecocentro
ve mandelo fursi in confusion – le indicazioi su al Monumento?

Se pol sbaiase per carità – i ve dis de ndà vers el Duran
a un forest che no el sà le strade – sti giri i lo mandarà in afan

I à da ese tanti sconfusionadi – parchè l'è roba dapertut impiantada
e ghe toca al Gruppo Ambiente – coì la vosa miseria binada.

I è fin masa volenterous – guanti, sachet e restel in man
pecà che la “giornata ecologica” – tocarae fala zinquanta olte l'an

Ma tornando fora al Palaz Comunal – l'è na situazion che fa pecà
per no vede tute chele macerie – no te sa pì quanti oci serà

che bela reclam che fon – a chi de sgionda su la nosa val
co na bela retina de plastica – te sconde via ogni fal!

E giusta per fane perde via – i met i fior sul soler del Comun
ma basta ndà inte drio – per spasemase, l'è la tera de nisun.

No me fae gnaca pì tanta marevea – de tut sto deslagnà
bademo ades polito – chel che me tocarà da ve contà

La ciape en cin pì larga – ma reste incuconà pasà via el molin
aveo sentù che del Pont del Felice – se n avea bù a mal anca Bottacin?

Per l'emozion de avè rivert el Pont – nisun i lo avea invidà
“Gnanca en scheo no rivarà pì su” – el ghe à cridà al Podestà

Oleo che mo tuti desmentegoi – manchea ancora da mete le sponde
elo fursi che per chi de la Region – ogni momento l'è giust per se onde?

Fatostà che ancora ades – la storia infinita la se fa semper pì fina
sione seguri che el tecnico – no el ebe in progetto el Pont de Messina?

E badevemo vers dugn – scioparà na rognà ancora pì granda
no sé se i olea fa mucimuci – ma la poie istes mi la domanda:

E co el Pont de Lantrach – come sione po metudi?
Dopo zerte svergognade – i farae meio a stasene scondudi

Fermi, fon en barch indrio – val la pena che meio la conte
da quant grosa che la è – me se inriza fin tute le ponte

A spetà m'è cresù la barba – anca sul cul no solche sul muso
ma in grazia al Signor i lo medeghea – dopo quasi zento ani de uso

L'è el problema che à meteghe le man – toca intivà la staion pì giusta
meio l'insuda? Eh no! A chi da Belun – l'è proprio chesto che ghe susta!

Co ben l'Aministrazion l'era riusida – a comedà en bel proget
chi del trasporto i se à rendù cont – che La Val l'è piena de stret

E sicome che el servizio – no i lo fa amaca parché i è gentili
i à ben specificà subito – che inte le burele no pasea el trili

I à parlà ciaro l'interuzion del trasporto – se i sera l'unica cal larga
o la paga el Comun – o i cari avvocati i ghen poiarà na carga

Che vergogne! No sion mia pore – l'è ani che i penz sto mus
manchea solche che se metese in mez – chi truli de la Dolomitibus

E benedeti i nosi aminatori – no i savea pì a che sant se afidà
per no riscia de fa la roba giusta – i à deciso che se el serarà d'istà

Ma me vien fin el pel su dret – co i cambiarà la viabilità comunal
fali pasà i furgoi e le machine – su per la passerella pedonal?

Me pense i farà en senso unico – che fa tut en baroutolon
e per rivà inte a Conaia – te toca partì fora in Cordion

E abadase onde che te pasa – me son ciapà na mucia de pache
aone i asfalti col tarol? – O le strade come i fos... de le vache?

Somea che anca per chesto – sie previsti grandi laori al Bilancio
l'è semper sul finale – che le opere pubbliche le ciapa slancio

Son stat proprio spuntigous – ma die valc de pì
chel che i à podù i à fat – daspes senza gnanca ne l di

Però inte l'unica outa de l'an – che vet en cin de movimento
come el solito su la nosa val – cala el mutismo de en convento

E a proposito de fazende mistiche – o de luoc del gran mistero
vede noseche case co i scur seradi – segur l'è pì vita in zimitero

In quanti che ciama la Pro Loco – in zerca de en posto o de n let
Sente sonà chel tanfanari tuti i di – chi che no scouta nianca no cret

I podarae riverde el Ufficio Turistico – industriase con calche novità
cenise a caro i foresti che vien su a spende – sieo mat? L'è pì fazile serà.

Aveo abadà che na outa – con nia i rivea dapartut
cresudi a barele de grasa – e a pile de fegn sut

L'è tuti che se impienis la boca – ciacolando de gran progresso
ma mi me sa che pì ndon avanti – pì va tut do per el cesso

No siè boni de fa su – gnanca i oniz do inte la val
zenza tanta marevea – se el bostrich el fà tut dal

E da noseche bande – l'è ancora pez dobas
e co venta en cin de pì – la è fenida anca la pas

Com'ela che inte in Fres – no se à spostà na fuoia?
Speteo n'otra ventada – per fave vegni la voia?

Avè metù en cartel – “traffico interdetto a mezzi e biciclette”
come se a ndà a piè – le robe le ndese pì drete

Pasagi sot e soura – e sgamberloi indana
per rivà inte al capitel – toca fase la ginkana

E mi che olee fa el bulo – ala corsa “Su e Do per i Coi”
m'à cognù taià fora Fres – e ciapà quatro scurtoi

Perché chi che fa la varda – no vol ciose sta responsabilità
ma no sarie pì tanti riguardi – se se la ciapese la comunità...

Da puoc temp toca sta su dret – è sentù en udor nuof
l'era ani che i era sparidi – l'è tornà a spontà i luof

No i era na specie animal – che riscea de fenì in estizion?
Mi me par che sie pien le vize – el cul dei cervi el ghe farà bon

Dalver me par che no se fae nia – e mi me toca sta in campana
parché l'è natimo che i me saie – no sé se ghe pias el saor de cana

Zenza tema vae in giro per sti bric – ma co ben me inacorde
me i cate drio la ciopa – e co la sbufada i à proà a me morde

Mi capise mi che i à fam – ma no se pol faseli rivà su la scheina
tuti chi che mena el cagnet – i riscia che el devente zeina

Nia nia a girà per bosch – meio ciamà Madone e Santi
mancomal che en cin qua e là – i sturta su anca sti schianti

Ma oramai no basta pì – trator de dase e ram
per rencurà su – pasà i camion de legnam

E intant che su per Folega – i à ver vare e stradoi
a pasà inte per i stret – in ve tira do i cantoi

E se inte a chel dei Ranci – l'an pasà i ghe à fat el pel
sto an do dai Toneti – i ghe à butà via el capel!

Speron ben che en viaz o l'auter – co na manovra sbaliada
al William no ghe rive i panet – direti fora per strada!

Ahi ahi! Cambion discorso – seron su ste ciacole longhe
col nervous che ghe è fat venì – i se avarà magnà le ongie

Sente belche la me fin – prest me 'n rivarà na dose
ma prim de saludave – oi recordà ancora doi robe

L'an pasà l'è tornà a ripartì tut – e avè fat en bel da mat
souratut cande su in Col – me avè fat fà quattro at

Me s'è impieni el cuor – con tuti chei gran laori e pareci
avè proprio tornà a mete in piè – chel che ve avea asà i veci

Son saldo drio girolà – ma sto an è fat tanta pì fadiga
che sie per chesto che el me descòre – par na careza de ortiga

No ste crede a tut chel che i ve dis – verdì le teste zenza ese mul
parché con chel che i scrif sul giornal – convien semper netase el cul

L'è na guera sconduda drio el canton – che copa tuti, doveni e ronchi
ma chel che conta l'è che el Covid – ades se ciama “mal ai bronchi”

Mi ve die fora dret chel che pense – besuchee en cin ma doman la me pasa
ma ghen e autri de sustadi – che descarga el malcontent co na mastela de grasa

Ades basta! Son stuf neiger de voiauter – tanto no mudarà mai nia
no vede l'ora de deventà fiadigole – che el vent me portarà via.